



## INFORMACIJA ZA GRAĐANE BIH

Čikago, IL (28.04.2009). Nakon objavljivanja našeg saopćenja za javnost 23.03.2009.godine u vezi evidentiranja jedinstvenih matičnih brojeva građana (JMBG), jedan broj državljana BiH koji živi u SAD-u se obratio našem konzulatu tražeći dodatna pojašnjenja vezano za ovu problematiku. U cilju bolje informisanosti naših državljana, dajemo ovo informaciju sa listom najčešće postavljenih pitanja te nudimo odgovore koji će, nadamo se, doprinijeti pojašnjenju problematike.

**P: Nedavno je GK BiH Čikago izašao sa saopćenjem za javnost povodom evidentiranja JMBG. O čemu se radi?**

O: Projektom CIPS je 2003. godine uvedena jedinstvena elektronska baza podataka svih građana Bosne i Hercegovine (BiH). Svi građani BiH koji su izvadili CIPS-ovu ličnu kartu ili vozačku dozvolu pokazatelj je da se nalaze u jedinstvenoj bazi podataka. Svi oni državljani BiH koji od 2003 godine nisu vadili ličnu kartu ili vozačku dozvolu, a žive u SAD-u, pokazatelj je da se ne nalaze u jedinstvenoj bazi podataka BiH.

Da bi se evidentirali u ovoj bazi podataka, naši državljani imaju dvije opcije. Prva je da prilikom sljedeće posjete BiH izvade ličnu kartu što će biti znak da su izvršili evidentiranje. Za naše državljane koji nisu u mogućnosti da putuju za BiH, daje im se mogućnost da putem našeg konzulata, evidentiraju svoj JMBG (jedinstveni matični broj građana). Evidentiranje JMBG je dakle postupak unošenja vašeg JMBG odnosno vaših osobnih podataka u CIPS-ovu elektronsku bazu.

**P: Šta je potrebno uraditi da bi se evidentirao JMBG?**

Potrebno je dostaviti rodni list i uvjerenje o državljanstvu (oba dokumenta u originalu i ne starija od 6 mjeseci) te ispunjen Zahtjev za evidentiranje JMBG, poznat kao formular JMB-7. Ova dokumenta se dostavljaju da bi se potvrdio državljanjski status osobe, te se podaci sa ova dva dokumenta unose u zahtjev elektronskim putem iz Čikaga, odnosno Vašingtona, i prosljeđuje direktno u CIPS-ov ured općine u kojoj stranka ima mjesto prebivališta. Preporučujemo da evidentiranje obavite na vrijeme tj. prije nego što vam budu potrebni dokumenti (pasoš i sl.) kako nebi dovodili sebe u neugodnu situaciju čekanja.

**P: Šta je sa državljanima koji nemaju nikoga u BiH i kojima je teško nabaviti ova dokumenta?**

O: U tom slučaju naši državljani u SAD-u se mogu obratiti našem konzulatu za zahtjevom da im mi pribavimo ova dokumenta iz BiH. Nakon zaprimanja zahtjeva, isti će, putem MVP-a, biti

proslijeden matičnim uredima. Napominjemo da ovaj način dobivanja dokumenata traje nešto duže te se preporučuje samo našim državljanima koji nisu u žurbi. Dokument zahtjeva za pribavljanje rodnog lista i uvjerenja o državljanstvu, kao i formular JMB-7 se mogu dobiti putem konzulata ili na našoj web stranici [www.gkbihcicago.com](http://www.gkbihcicago.com).

**P: O kakvim poteškoćama se radi kada se kaže da će naši državljani imati poteškoće u ostvarivanju svojih prava ako ne evidentiraju JMBG?**

O: Instrukcija iz MVP (Ministarstvo Vanjskih Poslova) kaže da DKP-i nemogu izdavati pasoš građanima BiH bez evidentiranog JMBG. Dakle, svi naši državljani koji nisu evidentirani a traže novi pasoš BiH, trebaju dostaviti rodni list, uvjerenje o državljanstvu te popunjeni formular JMB-7. Nakon zaprimanja ovih dokumenata, naš konzulat vrši evidentiranje JMBG elektronskim putem a zatim pristupa proceduri izdavanja pasoša. S toga, procedura izdavanja pasoša je vremenski nešto duža za osobe koje nisu evidentirane. Osobe koji nemaju evidentiran JMBG će i dalje trebati dostavljati dodatna dokumenta za pojedine konzularne usluge (rodni list, uvjerenje o državljanstvu ne stariji od 6 mjeseci) da bi ostvarili svoja prava putem Generalnog konzulata u Čikagu (pasoši, izjave, punomoći, sve vrste potvrda, regulisanje pitanja nekretnina u BiH i dr.).

**P: Dali postoji opasnost za osobe koje nemaju evidentiran JMBG da sutra izgube državljanstvo, nekretnine i dr.?**

O: Evidentiranje JMBG se ne tiče ove teme, dakle ne može vam niko oduzeti državljanstvo niti bilo koju nekretninu u BiH iz razloga što niste evidentirani. Poznato vam je da bez SSN broja možete imati problema sa ostvarivanjem svojih prava u SAD-u, tako i bez evidentiranog JMBG zahtijevat će više vremena u rješavanju vaših problema u BiH po bilo kom osnovu. Evidentiranje jeste pomoć građanima da jednostavnije i brže rješavaju svoja pitanja iz inostranstva.

**P: Mnogi naši državljani imaju BiH pasoš na kojem je upisan JMBG? Dali to znači da je ovim državljanima evidentiran JMBG?**

O: Gotovo svi naši građani imaju svoj JMBG i on se upisivao i upisuje u sve lične dokumente. Stoga JMBG upisan u pasošu ili na nekom drugom dokumentu ne znači da je i evidentiran. Da ponovimo, evidentiranje u BiH je počelo tek 2003. godine. Državljanima BiH, koji borave u inostranstvu tolerisano je, nakon uspostavljanja jedinstvene baze podataka 2003. god. (CIPS), izdavanje pasoša po starom sistemu sve do danas. Dakle, većina državljana BiH koji imaju važeći BiH pasoš ne znači da im je JMBG i evidentiran.

**P: Koje su pogodnosti čina evidentiranja JMBG?**

O: Naš Konzulat će imati direktan pristup vašim personalnim podacima. Očekuje se ubrzo da ti podaci budu upotpunjeni podacima iz vaših matičnih ureda u BiH (rodni list, uvjerenje o državljanstvu, vjenčani list). Dakle, vaši podaci će se nalaziti u jedinstvenom sistemu i imat ćemo pristup elektronskim putem iz Čikaga ili Vašingtona. Kompletiranjem osobnih podataka u jedinstvenoj bazi eliminisat ćemo obavezu dostavljanja rodnog lista i uvjerenja o državljanstvu.

**P: Koliko dugo sada traje procedura izdavanja pasoša putem DKP-a Čikago?**

O: Zakonski rok za izdavanje pasoša našim državljanima u inostranstvu je do 60 dana. U prosjeku, procedura izdavanja pasoša je kraća od zakonski predviđenog roka osim u onim slučajevima kada dokumenti (rodni list i uvjerenje o državljanstvu) kasne sa dostavom iz BiH. Za osobe koje su evidentirane, pasoše izdajemo u periodu od 2-3 sedmice. Za sve ostale, procedura traje duže i zavisi od brzine dobivanja dokumenta od strane matičnih ureda iz BiH a u cilju evidentiranja JMGB.

**P: Zašto je proces izdavanja pasoša dug, zašto nemožete izdati pasoš za par dana?**

O: Pasoši BiH se štampaju u BiH a ne u Čikagu ili Vašingtonu, kako jedan broj naših državljana smatra. Takođe, vrlo česta situacija je da naši državljani predaju zahtjev za izdavanje pasoša nakon što im je istekao postojeći pasoš ili pred sami put u BiH te očekuju da im se pasoš odmah izradi. Najveći problemi su sa našim državljanima kojima su pasoši istekli i koji moraju hitno putovati za BiH (smrtni slučaj u porodici ili slično). Zato savjetujemo svim našim državljanima u SAD-u da predaju zahtjev za izdavanje pasoša 2-3 mjeseca prije nego što im postojeći istekne da bi izbjegli eventualne neugodnosti.

**P: Velike su gužve na šalterima u BiH te je potrebno provesti čitav godišnji odmor pokušavajući da pribavim ličnu kartu.**

O: Odmah nakon uspostave CIPS-a uistinu su postojale velike gužve. Međutim, u većini općina je sada situacija puno bolja i ne postoji više gužva na šalterima za izradu ličnih karata. Naravno, nemogu se lična dokumenta dobiti za isti dan ali nećete potrošiti ni mnogo vremena po navedenom pitanju.

**P: Šta je prioritet?**

O: Nadamo se da će nakon ovih informacija naši državljani prepoznati da je prioritet, prilikom odlaska u BiH, izvaditi ličnu kartu odnosno evidentirati se. Sa ovim postupkom evidentiranja uveliko se olakšava i pojednostavljuje ostvarivanje prava naših državljana u inostranstvu. Ubijedeni smo da prilikom posjete BiH nećete naići na očekivanu gužvu u općinskim CIPS-ovim uredima samim tim što su građani koji žive u BiH već davno regulisali pitanje ličnih dokumenata. Apelujemo na sve one državljane koji putuju u BiH da iskoriste posjetu i odmor i regulišu gore navedena pitanja.



**GENERALNI KONZUL**

*Kajević*  
**Eldin Kajević**